

आकाशवाणी जयपुर-अजमेर
प्रादेशिक समाचार

दिनांक : 29.01.2026 समय : 18.45 बजे

- वित्त मंत्री निर्मला सीतारमण संसद मांय आर्थिक सर्वेक्षण पेश कीनो-चालू माली साल मांय जी.डी.पी. मांय बधोतरी री रेट 7 दशमलव 4 फीसदी रेहवण रो अनुमान ।
- सुप्रीम कोर्ट विश्वविद्यालय अनुदान आयोग रा नुवा समानता संबंधी नियमां माथे रोक लगायी ।
- विधानसभा रा बजट सत्र रा दूजा दिन आज राज्यपाल रा अभिभाषण माथे चर्चा ।
- विधि मंत्री जोगाराम पटेल कह्यो -प्रदेश री पहाड़ी अर दुर्गम ठौड़ां अदालतां खोलण सारु सरकार गंभीरता ऊं कोशिश करेला ।

000

केंद्रीय वित्त मंत्री निर्मला सीतारामन आज संसद सामी आर्थिक सर्वेक्षण पेश कीनो । इण मांय चालू माली साल मांय वास्तविक सकल घरेलू उत्पाद-जीडीपी मांय बधोतरी री रेट सात दशमलव चार फीसदी रेहवण जदके माली साल 2026-27 मांय बधोतरी री रेट छह दशमलव आठ ऊं सात दशमलव दो फीसदी बीचे रेहवण रो अनुमान लगायी ज्यो है । आर्थिक सर्वेक्षण रे मुजब देश री माली व्यवस्था चालू माली साल मांय बधोतरी री तेज़ गति बणायी राख्यी है । आर्थिक सर्वेक्षण मांय बिरखा रा अनुकूल हालात री मदद ऊं चालू माली साल मांय खेती-बाड़ी अर इण ऊं जुड़्या कामकाज मांय बधोतरी री रेट तीन दशमलव एक फीसदी रेहवण रो अंदाज लगायी ज्यो है । ई रे मुजब तरकारियां अर दाळां रा मोल मांय कमी ऊं महंगाई री रेट कम व्हे र एक दशमलव सात फीसदी रह ग्यी है ।

ई बीचे केंद्रीय वित्त मंत्री निर्मला सीतारमण 1 फरवरी ने माली साल 2026-27 रो बजट पेश करेला । आम बजट ऊं किसानां अर नौजवानां समेत न्यारा-न्यारा तबकां री जनता ने घणी उम्मीदां हैं । भीलवाड़ा रा सामाजिक कार्यकर्ता दुर्गेश शर्मा बजट मांय नौजवानां ने नौकरी-धंधा रा मौका मुहैया करावण सारु नुवी योजनावां रा ऐलाण अर महंगाई ऊं साता दिरावण सारु प्रावधान करण री आस जताई ।

000

प्रधानमंत्री नरेन्द्र मोदी कह्यो है के **भारत-यूरोपीय संघ मुक्त व्यापार समझौता** खुद माथे भरोसो राखण वाळो, होड़ करण वाळो अर सामान बणावण वाळो भारत बणावण री दिशा मांय खास कदम है । वे बजट सत्र रा दूजा दिन आज संसद भवन परिसर मांय खबरनवीसां सागे बातचीत कर रह्या हा । प्रधानमंत्री कह्यो के मुक्त व्यापार समझौता ऊं नुवो बाज़ार खुल ग्यो है अर देश मांय भांत-भांत रा सामान बणावण वाळां ने इण रो फायदो उठावणो चाहिजे ।

.....

भारत अर यूरोपीय यूनियन बीचे लारला दिनां करी ज्या करार ऊं भीलवाड़ा रा कपड़ा कारोबार ने घणो फायदो मिलेला । भीलवाड़ा टेक्सटाइल ट्रेड फेडरेशन रा वरिष्ठ उपाध्यक्ष प्रेम स्वरूप गर्ग कह्यो के ई करार ऊं कारोबार मांय बधोतरी व्हेला । वे भीलवाड़ा ऊं दिसावर मांय बेच्या जावण वाळा कपड़ा री तादाद सात हजार करोड़ मीटर ऊं बध र दस हजार करोड़ मीटर व्हेवण री आस जतायी ।

000

लोकसभा अध्यक्ष ओम बिरला आज सदन ने राष्ट्रमंडल अध्यक्षां अर पीठासीन अधिकारियां रा सम्मेलन-सीएसपीओसी 2026 री जाणकारी दीनी । वे बतायो के 14 ऊं 16 जनवरी ताई व्ह्यो 28वां सीएसपीओसी सम्मेलन 16 साल रा आंतरा पाछे भारत मांय राख्यी ज्यो ।

.....

सुप्रीम कोर्ट विश्वविद्यालय अनुदान आयोग रा उच्च शिक्षा संस्थानों में समानता सर्वधन नियम-2026 ने टाळबा रा हुकम दीना है। अदालत नियमां माथे कुछ आपत्तियां जतायी, ज्यां मांय सामान्य वर्ग रा प्रति दुभांत बतायी ज्यी। अदालत मान्योड़ा न्यायविदां री समिति री ओर ऊं नियमां री समीक्षा करण री राय दीनी। मुख्य न्यायाधीश न्यायमूर्ति सूर्यकांत अर न्यायमूर्ति जॉयमाल्य बागची री पीठ विनियमां मांय संवैधानिकता ने चुनौती देवण वाळी तीन अर्जियां माथे सुणवाई रे दौरान आ राय दीनी। अदालत फिलहाल 2012 रा यूजीसी विनियम लागू राखण सारू कह्यो।

000

एसओजी आज कनिष्ठ अभियंता संयुक्त भर्ती परीक्षा-2021 रा पेपर लीक व्हेवण रा मामला मांय एक ए.ई.एन ने गिरफ्तार कीनी। अतिरिक्त पुलिस महानिदेशक विशाल बंसल बतायो के सितंबर 2021 मांय ओजू व्ही ई परीक्षा रो पेपर ई माफिया पैली ई लीक कर दीनी हो। जांच रे मुजब आरोपित गणपतलाल विशनोई गैर-कानूनी तरीकां ऊं परीक्षा पास कीनी। वो फिलहाल बाड़मेर मांय पी.डब्ल्यू.डी. मांय ए.ई.एन. ओहदा माथे नौकरी कर रह्यो है। ई मामला मांय जालौर रा रेहवासी जगदीश विशनोई ने ई गिरफ्तार करी ज्यो है।

000

विधानसभा मांय आज राज्यपाल रा अभिभाषण माथे चर्चा सुरू व्ही। इण री सुरूआत मांय सत्ता पख रा विधायक पुष्पेंद्र सिंह सरकार री उपलब्धियां रो ब्यौरो दीनी। वे गांवाई हलकां मांय नौकरी धंधा रा मौकां मांय बधोतरी री सराहवणा कीनी। दूजी कानी कांग्रेस रा विधायक हरिमोहन शर्मा सामाजिक सुरक्षा पेंशन मांय मोड़ो व्हेवण रो मुद्दो उठाता थकां कह्यो के प्रदेश मांय लाखां लोग केई महीनां ऊं पेंशन रो इंतजार कर रह्या है। जवाब मांय भाजपा रा अतुल भंसाली कह्यो के सरकार भ्रष्टाचार ने बिल्कुल बर्दाश्त नी करण री नीति माथे चालता थकां पेपर लीक गिरोहां रे खिलाफ करड़ी कार्यवाही कीनी है। सदन मांय चंदा अर पैली वाळी सरकार रा कामकाज रे दौरान व्हा कामां रा बारा मांय पख अर विपख बीचे तीखी बहस व्ही।

000

प्रदेश रा पहाड़ी अर मुश्किल ठौड़ां अदालतां खोलण सारू सरकार गंभीरता ऊं जतन करेला। विधि अर विधिक कार्य मंत्री जोगाराम पटेल आज विधानसभा मांय आ जाणकारी दीनी। विधायक जब्बर सिंह सांखला रा सवाल रा जवाब मांय वे कह्यो के बदनोर मांय फिलहाल अदालत खोलण रो कोई प्रस्ताव नी है। श्री पटेल कह्यो के साधनां री उपलब्धता अर हाईकोर्ट री मंजूरी पाछे ई नुवी अदालतां खोली जावेला।

000

प्रदेश रा आंगनबाड़ी केंद्रां माथे जगह अर साधनां री उपलब्धता रा आधार ऊं पोषण वाटिकावां विकसित करी जावेला। महिला अर बाल विकास मंत्री दिया कुमारी आज विधानसभा मांय प्रश्नकाल रे दौरान आ जाणकारी दीनी। सदन मांय शून्यकाल रे दौरान शिव रा विधायक रविंद्र सिंह भाटी राज्य रा आतूणी हलकां मांय खेजड़ी रा रूखड़ां री कटाई रो मुद्दो उठायो। वे कह्यो के जोधपुर, जैसलमेर, बीकानेर अर बाड़मेर जिलां मांय लारला 15 साल मांय 26 लाख ऊं बत्ता रूखड़ां काट दिया ज्यो। वे 50 लाख पेड़ और काटण री तैयारी रो आरोप ई मांड्यो।

000

“भारत दर्शन” कार्यक्रम रा तैत प्रदेश रा दौरा सारू आया कश्मीर रा विद्यार्थियां रो एक दल आज जयपुर मांय राज्यपाल हरिभाऊ बागड़े सागे मुलाकात कीनी। ई मौके श्री बागड़े कह्यो के कश्मीर ‘एक भारत श्रेष्ठ भारत’ री आत्मा है। वे विविधता मांय एकता अर भारतीय संस्कृति रा महत्व माथे ई जोर दीनी। श्रीनगर, पुलवामा अर बारामूला ऊं आया विद्यार्थी राज्यपाल ने राजस्थान री यात्रा रा अनुभव बताया।

000

डूंगरपुर जिला मांय बेणेश्वर मेळो आज सुरू व्ह्यो। बेणेश्वर धाम रा महंत अच्युतानंद महाराज राधा-कृष्ण मिन्दर माथे ध्वजा फहरा र मेळा री सुरूआत कीनी। सोम, माही अर जाखम नदियां रा मिलण री ठौड भर रह्या ई मेळा मांय राजस्थान, गुजरात अर मध्य प्रदेश ऊं मोटी तादाद मांय लोग पूग रह्या है। प्रशासन अर पर्यटन विभाग री ओर ऊं मेळा मांय सांस्कृतिक कार्यक्रमां सागे खेलकूद होड़ां राख्यी जा रही है। 1 फरवरी ने माही पूण्यू रे मौके खास मेळो भरेला।

000

जैसलमेर जिला रा पोकरण मांय आज मरु महोत्सव सुरू व्ह्यो। कार्यक्रम री सुरूआत नेपालेश्वर महादेव मिन्दर मांय पूजा-अर्चना सागे व्ही, ज्यीं पाछे शोभा यात्रा निकाळी ज्यी। महोत्सव रा पहला दिन मिस पोकरण अर मिस्टर पोकरण होड़ां राख्यी ज्यी। ई सागे ई रस्सा-कसी, ग्रामीण खेल, दौड़ अर म्यूजिकल चेयर सरीखी होड़ां मांय मोटी तादाद मांय वठे रा लोग अर सैलाणी शिरकत कीनी।

000

केंद्रीय संचार ब्यूरो री ओर ऊं पाली रा राजकीय बांगड़ कॉलेज मांय दो दिन री मल्टीमीडिया प्रदर्शनी लगायी जा रही है। ब्यूरो रा क्षेत्रीय प्रभारी फूलचंद गहलोत बतायो के आज सुरू व्ही ई प्रदर्शनी रे जरिये नौजवानां

अर जनता ने केंद्र सरकार कानी ऊं चलायी जा रही जनता रा भला री डिजिटल इंडिया समेत न्यारी-न्यारी योजनावां री जाणकारी दी जा रही है।

000

सामाजिक न्याय अर अधिकारिता विभाग उत्तर मैट्रिक छात्रवृत्ति सारू अर्जी देवण री आखिरी तारीख बधा र 28 फरवरी कर दीनी है। महकमा रा निदेशक आशीष मोदी आ जाणकारी दीनी। वे अहलकारां ने शिविर लगा र पात्र विद्यार्थियां ऊं बत्ती ऊं बत्ती अर्जियां दाखिल करावण रा हुकम दीना। महकमा री अतिरिक्त मुख्य सचिव अपर्णा अरोड़ा सामाजिक सुरक्षा पेंशन सत्यापन अर दिव्यांगजन रा यूडीआईडी कार्ड बणावण सरीखा मामला बेगा ऊं बेगा निपटावण सारू कह्यो।

000

प्रदेश मांय गांवाई हलकां री जनता ने सरकारी योजनावां रो फायदो बेगो ऊं बेगो दिरावण सारू लगाया जा रह्या ग्राम उत्थान शिविरां मांय सरकारी योजनावां रो फायदो लेवण रा पात्र लोगां ने मौके ई जोड़्या जा रह्या है। ई रा तैत आज ब्यावर जिला रा न्यारा-न्यारा गिरदावर सर्किलां मांय खास शिविर लगायी ज्या। जिला कलेक्टर कमल राम मीना बतायो के अब 31 जनवरी, 1 फरवरी अर 5 ऊं 9 फरवरी ताई शिविर लगाया जावेला।

000

मुख्यमंत्री भजनलाल शर्मा आज नई दिल्ली मांय केंद्रीय कृषि अर ग्रामीण विकास मंत्री शिवराज सिंह चौहान ऊं मुलाकात कीनी। वे प्रदेश सारू वीबी जी राम जी री मेटेरियल कंपोनेंट मद मांय सवा आठ सौ करोड़ रुपया ऊं बत्ती रकम देवण सारू केंद्र सरकार रो आभार जतायो। केंद्रीय मंत्री ई मद मांय आगली किश्त रो चुकारो बेगो करण रो भरोसो दिरायो। मुलाकात रे दौरान राज्य मांय खेती-बाड़ी अर गांवाई हलकां मांय विकास ऊं जुड़ी योजनावां रा बारा मांय चर्चा करीजी।

000